

Ահա սիրելիս, այս է մերկ և այլանդակ իրականութիւնը:

Յը սիրելիս,

Քո՛:

ԱՐԱՄ

ՅԳ. Նամակս նոր էի փակել, երբ ստացայ 22 Սեպտեմբեր թւակիրդ. պատասխանը միւս անգամ:

Ա. Ե.

Փէրիա—Բոլորան 30 Սեպտեմբեր, 1918.

Սիրելի Վարդուհի,

Գիւղերի նկարագրութիւնիցս յետոյ՝ Դու փափագում ես, որ ծանօթացնեմ Քեզ գիւղական բնտանեկան վարք ու բարքի, նախապաշարումների և սնոտիապաշտութիւնների, զգեստի ու զարդի և տօների հետ, թէ ինչպէս են կատարում նշանադրութիւնը, հարսանիքը, թաղումը, Ծաղկազարդը, Համբարձումը և այլն: Շատ ցաւում եմ սիրելիս, որ այդ Քո ցանկութեանը ես չեմ կարող լիապէս բաւարարութիւն տալ, որովհետեւ անձամբ չեմ մասնակցել այդ հանգէսներին: Բայց քանի որ փափագում ես, կաշխատեմ Քեզ որոշ չափով բաւարարութիւն տալ: Այդ նպատակով՝ երէկ ինձ մօտ կանչեցի գիւղի կանանցից մի քանիսին ու քահանային և ահա համընկելով նրանց տւած տեղեկութիւնների վրայ՝ գրում եմ Քեզ առանձին-առանձին վերնագրերով:

*

* *

Փէրիա գաւառի հայաբնակ բոլոր գիւղերի նիստ ու